

Dr. Edward Cheung Center for Innovation ta habri



PRIMIENDO un conopi Eupahuis a keda habri oficialmente diahuebs anochi. E mannan cu a primi e conopi tabata di Comisario di Desaroyo di Union Europeo Andris Piebalgs, Minister-President Mike Eman, Minister di Integracion, Infraestructura y Medio Ambiente Benny Sevinger, Mike de Meza, Minister di Finanza, Comunicacion, Utilidad y Energia, y Director di Utilities Franklin Hovertsz.

Na momento cu a primi riba e conopi a surgi un serie di vuurwerk como ciere di e ceremonia festivo. Seguidamente e vehiculo Force IV a yega cu e yabinan di e edificio y e huespednan por a dreña y admira e sede di Eupahuis, TNO y organisacion pa Public-Private-Partnerships. Centenares di huespednan a reuni na e sitio pa presencia e apertura festivo. Nan a wordo honra cu un actuacion di Popcorn Dancers kendenan a duna un show di baile acrobatico espectacular. Despues di e ceremonia di bandera, a cuminsa canta e cancion Together as one, cu a wordo compone special pa e ocasion aki door di Vincent Tonk. TNO ta un di e partnernan den e proyecto y di-

rector Mart van Bragt a bisa cu e duda cu semper e tabatin ora un persona presenta cu plannan bunita, a desaparece inmediatamente ora cu el a bishita Aruba. "Scientific heaven", el a yama Aruba cu su biento, solo y temperatura tropical. El a elogia Prome Minister Mike pa su vision y e empuhe pa realisa esaki tambe.

Minister Hulandes di Asuntonan Interno y Relacionnan di Reino Piet-Hein Donner, ta mira e establecimiento di TNO un paso nobo den direccion di mas cooperacion entre e companianan Hulandes y Aruba. "Aruba como gateway tin dos pata," segun Donner. "Europa por, via Aruba yega Sur America, pero tambe Aruba via Hulanda por yega Europa." E Protocol firma mas tempran den dia entre Hulanda y Aruba, segun Donner, lo mester wordo mira como e "framework" pa sigui desaroya tur sorto di posibilidad, entre otro e gateway.

Minister-president Mike Eman a enfatisa cu apertura di Eupahuis ta importante pa realisacion di algun meta di Gobierno Arubano. "Aruba ta un isla chikito caminda e ultimo decada masha hopi cos a cam-

bia. Turismo a florece, pero awor nos mester haci otro es-cogencianan. E ultimo añanan den Reino hopi a cambia. Na mundo tambe tin hopi cos ta cambiando awor y eynan nos chensnan ta. Nos mester saca probecho di e posibilidad y oportunidadnan y uza esakinan na bentaha di nos tur."

Comisario Europeo Piebalgs tabata e ultimo orador di e lista. El a uni su mes na palabranan di Prome Minister Eman señalando cu na Europa tambe tin masha hopi cos cambiando. "Te cu recientemente Europa no tabata masha entusiasmo pa haci negoshi cu Sur America. Debi na demasiado crisis na e paisnan ey. Awor Europa mes ta recuperando di crisisnan y ta mira cu tin un mercado enorme na Sur America. E interes pa Aruba como gateway sigur t'ey." Piebalgs no a bin man bashi tampoco. Durante e ceremonia di apertura di Eupahuis a firma un acuerdo entre Europa y Aruba pa apoyo riba tereno di enseñansa. Despues di proyectonan di Museo Arkeologico y Parke Arikok, Aruba pa di tres biaha tin un probecho grandi di e relacionnan cu Union Europeo.